

REGIONAL NEWS

PRESBYTERY

Presbyterian Church of India Mizoram Synod hnuaia Inkhawmpui lian ber dawttu Presbytery Inkhawmpui Ningani zan atanga Mizoram chhung leh pawn hmun hrang hranga hman mek chu zanin hian a tiak ang.

Ningani khan Nomination Committee, Finance Committee leh Sub - Pastoral Committee-te an thu a, Kohhran Upa thlan tharte Exam buatsaih a ni bawk a, zan inkhawmah Palai lawmna leh Pastor Bial Report ngaihthlak a ni. Zirtawpni leh Inrinni kha Rorel Inkhawm neih a ni a. Presbytery thenkhat ah chuan Inrinni-ah chauh Rorelneih ani. Zan lamah vantlang Pathian biak Inkhawm buatsaih thin a ni a, vawiin chawhma-ah Upa Nemngheh Inkhawm buatsaih a ni a, chawhnu chu Lalpa Zanriah Sakramen leh Upa thite sunna inkhawm atan hun hman a ni a. Zaninah hian Presbytery Moderator kalchhuakte'n Valedictory Sermon an sawi ang a, inkhawmpui hi a tiak dawn a ni.

Synod puipa ten Presbytery hrang hrangah inkhawmpui hi an hmanpui a, Moderator Rev. R.C. Lalnghakliana chuan Tuivai Presbytery-a hmanpui a ni.

Mizoram Synod Website tarlan danin, Mizoram Presbyterian Church Synod hnuaia-ah hian Presbytery 47 awmin Pastor bial 298 a awm mek a, kohhran member nuai 6 sing 2 7,719 an awm mek a ni.

<><><>

BHARAT SERIES NUMBER

Mizoram Transport department chuan India ram puma lirthei registration hman tawm theih Bharat Series (BS) number 139 an pechhuak tawh.

Akashvani zawhna chhangin Transport department hotute chuan Ministry of Road Transport and Highways in kum 2021 August ni 26 khan thuchhuah siamin BS number hi hemi kum vek, September Ni 15 atanga hman tan tur a nih thu an tarlang tih an sawi a. Mizoramah chuan BS number an pekchhuah hmasak ber chu kum 2022 September Ni 1-ah a nih thu an sawi a. A diltu nazawng pek an nih loh thu leh Rule 47 of the Central Motor Vehicle Rules, 1989 in a phut ang document nei te chauh Bharat Series number pek theih an nih thu leh chung mite chauh chu pek thin an nih thu an sawi a ni.

BS number pekchhuah thin te hi a tlangpuiin sorkar leh private hnuaia India ram hmun hrang hranga hna avanga kal kual reng te an nih deuh ber thu transport department hotute chuan an sawi a. Mizoramah pawh diltu tam tak an awm tawh laiin danin a phal anga pekchhuah te chu mi 139 an nih tawh thu an sawi a. State khat tana register lirtheite chu dan angin hmundanga thla 12 aia tam a awm a nih chuan a lirthei awmna state-ah register that leh tur a nih thu an sawi a. Hetiang lak atanga an fihlima harsatna awm loa khawi hmunah pawh an lirthei an tlantir theih nan danin a pawnsak chin BS number nei thei te chu pek thin an nih thu an sawi a ni.

<><><>

SOLID WASTE

Adviser to Chief Minister Dr. Lorraine Lalpeklana Chinzah chuan sorkar hmalakna kawng hrang hrangah tha tak, rintlak leh huntiam chhunga zawh a nih theih nan contractor ten theihtawp an chhuah a tul tih a sawi. Nimina Lawngtlai Solid Waste Management System a tlawhnaah he thu hi sawiin Lawngtlai East Bialtu MLA ni bawh Dr. Lorraine Lalpeklana Chinzah chuan Lawngtlai khawpuiin bawhlhawh sawngbawlna tha tak a nei tur chu lawmawm a tih thu leh, peih fel a nih hunah chuan Lawngtlai khawpuiin faina leh thianghlina kawngah nasa taka hma a sawn phah dawn thu a sawi a. Mipuiten an mamawhna hriaa, chak leh tha taka hna thawh a tul thu leh a hun taka zawhfel a a pawimawh thu a sawi a ni.

Lawngtlai Solid Waste Management System hi UD&PA department hnuaiah , cheng nuai 697 sing 70,000 senga sak tur a ni a. Nikum October thla khan sak tan niin kum hnih chhunga zawh fel tura ruahman a ni . Solid Waste Management System-ah hian - Wet Waste Composting Centre, Dry Waste Composting Centre, Site Office cum Staff quarters, Sanitary Landfill leh a dangte a awm dawn a ni.

<><><>

DURGAPUR RAPE CASE

West Bengal-a Durgapur khuaa MBBS zirlai hmeichhe pakhat pawngsualna thleng thubuaiah Police-ten mi 3 an man a, an zavai hian Bijra khaw mi an ni a, vawiinah court-ah hruai nghal an ni.

He pawngsualna thlenga inhnamhnawiha hriatte zawn hna hi Bijra khua leh a chhehvelah ngawrh taka thawh a ni a, pawngsual tawktu thianpa pawh thu zawhfiah mek a ni.

<><><>